



## PRÆFATIO.



In causas forte inquiras, Lector omni honoris cultu prosequende, cur hæc, quæ de usura agit, materia mihi arriserit, aperiam breviter. Cum sæpenumero & cum aliis hæctenus & mecum ipse disputavi, num licita sit usura, nec ne? varia tum affirmanti tum neganti argumenta, pondere suo utrobique prædita, in promptu erant. Adduxi morem apud omnes fere gentes hodie introductum, quod apud Christianos præcipue usura obtineat, quod rebus commutandis communicandisque invicem egregie inserviat, mercaturæ florem & pariat & conservet, & quæ porro commoda inde enascantur. Neque ipsas etiam Leges Naturæ habui adversas, quæ uti æquitati, ita usuris favere omnino videntur. Quibus ut me scrupulis expedirem, ipsum tempus ansam mihi præbuit. Hoc enim monitus, ut iis, quorum beneficio Academicis hucusque Musis invigilare & licuit & etiamnum licet, Vobis videlicet, Illustres Ratisponæ Proceres, quantum profecerim specimine quodam significarem, hanc ipsam supra dictam quæstionem publicè ventilare atque iudicii mei qualiscunque periculum facere in animum induxi. Quocirca lubentissime doctorum quorumque Virorum exosculabor informationem, & si quid à me dictum est, quod iis forte displiceat, dictum omnino non esto.